



5. Radunanza cumünela dals 15.12.2015 a las 20.00 in sela polivalenta S-chanf

Presidi: Duri Campell

Actuar: Duri Schwenninger

Preschaints: Preschaints sun 25 votantas e votants

Büro electorel: Peter Fischer e Linard Luzi

Tractandas:

1. Protocol da la radunanza cumünela dals 16.09.2015
2. Preventiv 2016
3. Pè d'impostas per l'an 2016
4. Cunvegna da prestaziun per realisaziun svilup regiunel (management regiunel) cun la regiun Malögia
5. Renovaziun preisas d'ova in Gianduns, credit supplementer ill'otezza da fr. 182'000.00
6. Nominaziuns tschernas substitutiva dals 10 schner 2016 pel trienni 2014-2016
7. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 16.09.2015 vain approvu cun gronda magiurited e sainza cuntravusch.

19 0.205 Rendaquint/planisaziun da finanzas Preventiv 2016

Il president preschainta in detagl il plan d'investiziuns per l'an 2016 e spiega tar mincha posiziun il proget correspondent. Zieva animeda discussiun decida la radunanza cun gronda magiurited e sainza cuntravusch d'accepter tuot las investiziuns suot fr. 300'000.00. Las investiziuns sur fr. 300'000.00 scu eir il proget da la halla scu deposit da laina in Bos-chetta Plauna vegnan suottamissas üna seguonda vouta a la radunanza cumünela. Impü vain giavüscho, da preschanter in üna prosma radunanza il plan da master da velos da muntagna. Il plan d'investiziuns 2016 chi prevezza da fer investiziuns brüttas ill'otezza da fr. 3'316'000.00 cun entredgias in fuorma da subvenziuns e contribuziuns d'arduond fr. 270'000.00. Scu basa infurmativa preschainta il president cumünel il plan da finanzas 2016 fin 2020. Impü repassa el ils posts i'l preventiv 2016 cun las pü grandas differenzas in conguel culs ans passos. Zieva chi sun gnidas dedas tuot las spiegaziuns decida la radunanza d'accepter il preventiv 2016 cun gronda magiurited e sainza cuntravusch.

**20 9.100 Pè d'impostas
Pè d'impostas per l'an 2016**

Il president spiega, cha'ls ultims ans s'ho pudieu serrer il rendaint cumünel cun remarchabels guadagn. Las investiziuns i'ls ultims ans s'ho pudieu finanzcher cun egens mezs, sainza causer novs debits. Zieva cuorta discussiun decida la radunanza cun granda magiurited e sainza cuntravusch da lascher il pè d'imposta per l'an 2016 scu fin co sün 75% da l'imposta chantunela simpla.

**21 0.130 Collavuraziuns intercumünelas
Cunvegna da prestaziun per realisaziun svilup regiunel
(management regiunel) cun la regiun Malögia**

Il president declera, cha'l management regiunel es ün'imsüra da la nouva politica regiunela da la Confederaziun. Cun quell'imsüra paun gnir sustgnidas vschinaunchas, regions e'l chantun cun üna promoziun dal svilup economic. Böt da la promoziun es, cha las regions vegnan u restan ablas da concorrenza, da sgürer plazzas da lavur existentas e s-chaffir novas, da creer valur e da contribuir uschè il svilup economic da noss chantun in sen positiv. Actuelmaing mainan las regions Mesolcina e Calanca, la regiun dal Parc Naziunel (Pro Engiadina Bassa/Cumün da Val Müstair), Surselva e Viamala scu eir las vschinaunchas Tavo e Clostra-Serneus e'l circol d'Engiadina'Ota insembel cun la vschinauncha da la Bregaglia e la regiun Valposchiavo organisaziuns sün la basa da cunvegnas da prestaziun cul chantun, üna piazza da lavur plaina. Las cunvegnas da prestaziun actuelas in vigur scroudan la fin da l'an 2015. La nouva proposta da la cunvegna da prestaziun cumpiglia differents müdamaints per ameglirer la lavur strategica ed operativa. Impü ho decis la Regenza Grischuna da metter a disposiziun pels ans 2016 fin 2023 per quist intent 1,0 milliun francs l'an. A la regiun vain la spüerta a custair arduond fr. 66'500.00 l'an, tenor la nouva spartiziun da la regiun füss que per nossa vschinauncha 3% da l'import, arduond fr. 2'200.00 l'an. La cunvegna vain stipuleda per 4 ans e po gnir prolungida. Zieva cuorta discussiun decida la radunanza cun granda magiurited e sainza cuntravusch d'accepter la cunvegna da prestaziun preschainta.

**22 7.000 Provedimaint d'ova
Renovaziun praisas d'ova in Gianduns, credit supplementer
ill'otezza da fr. 182'000.00**

Il depüto e vice-president preschainta il proget e spiega, cha la radunanza cumünela dals 24.08.2011 vaiva delibero ün credit ill'otezza da fr. 420'000.00 per fer las lavurs da renovaziun da las praisas d'ova in val Gianduns. Düraunt la fabrica s'ho chatto differentas novas praisas e s'ho decis da schlarger la lavur e cun que muntan eir ils cuosts sün arduond fr. 602'000.00. Siand cha las contribuziuns chantunelas sun entredas düraunt l'an curraint, dess gnir serro giò il proget. Zieva cuorta discussiun decida la radunanza cun granda magiurited e sainza cuntravusch da deliberer il credit supplementer ill'otezza da fr. 182'000.00.

**23 0.113 Elecziuns
Nominaziuns tscherna substitutiva dals 10 schner 2016 pel trienni
2014-2016**

Il president spiega, cha causa cha'l cusglier da scoula actuel, Michael Reimann, banduna l'Engiadina cun sia famiglia la fin da l'an, es gnieu decis da mner tres la tscherna supstitutiva als 10 schner 2016 a l'urna. Tenor constituziun ho d'avair lö aunz la tscherna üna radunanza per fer propostas, cun que s'ho decis d'integrer las nominaziuns illa radunanza da quista saira. Inavaunt spega'l, cha fin uossa s'ho annunzcheda Nina Defila-Bisaz. Our dal ravuogl nu vegnan fattas otras propostas.

Il president orientescha sur da la nouv'organisaziun turistica previsa Engiadina San Murezzan e cha'l cussagl es aunch'adüna cunter üna nouva clef da spartiziun.

Il president serra la radunanza a las 22.10 ed ingrazcha a tuot ils preschaints per lur cumparsa.

In buna fè

Il president:
D. Campell

L'actuar:
D. Schwenninger